

摘藻堂四庫全書薈要

集部

欽定四庫全書薈要

集部

文獻集卷十下

詳校官助教臣謝登雋



欽定四庫全書薈要卷一萬六千四百十九

集部

文獻集卷十下


元 黃潛 撰

碑文

嶺北湖南道肅政廉訪使贈中奉大夫江浙等處行中書省參知政事護軍追封南陽郡公謚

文肅鄧公神道碑

至正九年夏四月二十日知經筵事臣多爾濟巴勒同知經筵事臣額森呼都克臣潛等進講于明仁殿奏鄧文原經筵



舊臣歷事累朝備極榮遇茲又顯受聖恩贈封定謚墓上之石宜賜刻文上既可其奏命臣潛為之銘別勅翰林學士承旨臣起巖篆其額臣額森呼都克請就令臣多爾濟巴勒書丹上復如其請乃退而以前史臣范梈之狀授臣潛臣潛謹按故嶺北湖南道肅政廉訪使鄧公諱文原字善之曾祖從黼妣楊氏祖昭祖累贈嘉議大夫成都路總管上輕車都尉追封南陽郡侯妣羅氏南陽郡夫人考漳累贈中奉大夫四川等處行中書省參知政事護軍追封南陽郡

公妣孫氏游氏並南陽郡夫人其先由長安徙資中又徙綿之彰明杭為宋行都南陽郡公避蜀兵來依焉故今為杭州人公六歲入小學九歲從三山楊先生受春秋十五以流寓取漕薦暨科舉事廢遂一意務為聖賢之學行益修業益茂開門授徒戶屢常滿中州士大夫多慕而與之交徐文獻公琰高文簡公克恭知公尤深王叅政巨濟素刻深與公語亦嚴憚之巨濟後以事繫獄自悔不用公言初用江浙行中書省辟署杭州儒學

正秩滿調崇德州儒學教授用薦者擢應奉翰林文字
將仕郎同知制誥兼國史院編修官承旨閻文康公復
於寮友少所假借公獨見推重凡大撰著必屬焉由應
奉升修撰成宗即位就任轉從仕郎成宗崩預纂修實
錄姚文公燧王文肅公構並為承旨持見不同閱公所
具藁互有指擿公不與辨第令櫝藏以俟後數日二公
取視之皆莫能易一字以儒林郎出為江浙等處儒學
提舉教人先學行而後文藝士習為之不變召除國子

司業建白修明學政而樂因循憚改作者與之論不合
遂移疾去仁宗即位詔以科目取士江浙行中書省檄
公考延祐元年鄉舉公以朝廷立法之初多采考亭朱
氏貢舉私議慮遠方之士未悉上意大書其文揭示之
由是士無復踵異時場屋之弊尋以翰林待制承直郎
兼國史院編修官召臺臣交章舉之擢承德郎僉江南
浙西道肅政廉訪司事湖州民有抵夜禁者被執而遁
追者及之剗刃傷右脅其兄問殺汝者誰曰白帽青衣

而長身者也語畢即死其兄訴之有司歸罪於直初更張福兒坐繫三歲公閱其牘曰白帽青衣姑勿問福兒身不滿六尺未見其長且福兒用左手傷何以在右命覆勘之真殺人者張彈壓也建德戴汝惟被盜已捕寘獄中而夜有火其居者失汝惟所在公曰此有以也責有司推治得汝惟尸於水濱及其妻謀殺夫狀人以為神江陰饑民稱貸於富家不得則持火往取穀誤焚其屋十三人所分穀皆不滿五升有司悉當以強盜公謂

此非其情也時瘐死者已半餘皆杖而遣之平江僧訴
總管府判官理熙納其賂既誣服而公適至探得其情
杖僧釋熙移僉江東建康道肅政廉訪司事寧國諸路
茶課初止三千餘錠累增至十八萬錠皆鑿空取之民
間民受誣抵法則轉運司得以失覺察擅加罪五品以
下官州縣長吏皆重足而立公至而提舉茶事者適以
賄敗乃為設法而漸去其弊且建言宜罷茶司而使郡
縣領之饒州有告欺隱官糧者事連數百人累歲不決

公曰此不難知以官租為民田交易而抄戶時以之定
差徭經理時以之定租稅耳命據籍為定訟遂息小吏
有結為兄弟持官府短長者號五虎杖而流之人莫不
稱快有甥盜其舅家財者以贓滿罪至死公曰贓五十
錠盜惟二人其一人所分止五錠何也錄之得其實所
盜十三錠而已遂以減死論徽州民偽造楮幣於僧舍
有避雨者適見之其人懼事洩因啖以利而止之使為
烘焙獄具當死公曰造偽當死者其等有七烘焙當何

坐宜比行使加等杖罪事聞于朝報如公言徽州民謝
蘭家貧其從子回貸以錢而倍取其息又利其田宅而
欲構害之家僮死回使告蘭殺之公察其冤釋蘭坐回
天方旱而雨士子或為私書以非考亭之學公命毀其
書曰吾以息邪說也江浙行中書省復移行御史臺檄
公考延祐七年鄉舉得今翰林侍讀學士台哈布哈以為
舉首既上春官果為廷對第一士論翕服拜集賢直學
士奉訓大夫以地震應詔論弭災之道謂今天下士師

非才惟受成於吏死囚歲上刑曹類延緩不報瘦死者
多宜慎選理官死囚應決即決寃即釋之河北流民復
業朝廷雖令計口給緡錢而有司奉行不至宜會計海
運糧支發之羨餘隨處置倉以備凶年而賑之又申言
茶法之害民乞併罷轉運司以息人怨感天和時論避
之進奉政大夫兼國子祭酒依前集賢直學士被旨知
泰定元年貢舉及上親策多士于廷仍俾充讀卷官有
詔開經筵特命中書平章政事張蔡公珪翰林學士吳

文正公澄及公入侍其見知遇如此大駕時巡公當扈從苦脾疾就醫於京師遂乞謝事南歸歲餘召拜翰林侍講學士中奉大夫知制誥同修國史未行擢嶺北湖南道肅政廉訪使以疾不起天歷元年五月二十二日薨于杭州私第之正寢享年七十以其年七月十三日葬湖州德清縣千秋鄉百寮山之麓太常初議以莊康易公名今天子始用公門人集賢大學士馮公思溫之請特贈公中奉大夫江浙等處行中書省叅知政事護

軍追封南陽郡公改謚文肅娶徐氏封南陽郡夫人前

公一月卒合葬馬子男一人衍用公廕為承務郎江浙

等處儒學副提舉後公

闕

年卒女二人適石洞書院山

長史公埜司徒府掾史戴孟淳孫男一人萊孫公蚤慧

稍長能自植立外家游氏自清獻公侶相宋理宗門戶

輝赫公未始挾以自矜又嘗客於故后族謝氏家視華

靡豪縱事漠如也公丰姿凝粹氣貌純明內嚴而外恕

議論若不可犯至於以文相接以恩相加未嘗不使人

心悅而誠服平居善處窮約奉已常薄待人常厚諸生
有病而以橐中金託於公者曰萬一死願以歸吾親其
死也或竊以去公買金以付其親而終不言安南入貢
以黃金丹砂象齒為私覲之禮公却之其人曰清白物
耳公曰爾物雖清白我受之則污也所至僦屋以居四
壁蕭然晚乃捐俸貲買宅一區將以佚其老而疾亟矣
公於經史百氏之書無不究極其根抵為文精深典雅
東南遺老凋落既盡文章之柄悉歸焉及在朝廷施于

訓誥者溫潤而有體志於簡冊者確實而有徵詩尤簡古而麗逸凡所著有讀易類編若干卷內制集若干卷素履齋藁若干卷行於世工於筆札與趙魏公孟頫齊名徽仁裕聖皇后命以泥金書大藏經公應聘率門人前集賢待制班惟志等二十人北上竣事二十人皆賞官而公不預第隨牒調補教授一州後乃以文學政事昭被主知而至大官前後從游無慮數百人惟御史中丞王公士熙與馮公思溫位最顯其受業上庠而掇巍

科躋膴仕有名於時者尤多不可遽數也始公較藝鄉
闈臣潛誤辱薦名及公再主文衡臣潛遂忝預執筆茲
又獲載筆隸太史氏欽承明詔勒文公碑不敢以菲陋
荒疎伏闕控辭謹拜手稽首序而銘之銘曰

井絡之靈實鍾後賢展也鄧公受材孔全公方盛年盤桓
山澤翔而後集靡徐靡亟負其所韞時而出之學為儒宗
政為吏師其學斯何蜚英文苑鋪張皇猷裁成帝典弘敷
教道模範國人談經瓊厦堯舜吾君其政斯何肅將使指

扶善遏惡以樹風紀鼓之舞之士氣以振輶車所屆獄
無冤民聖門四科公兼其二學以從政匪有二致國之
老成天子所毗公不為起乘化而歸門生奉詔薦此樂
石庶無媿辭過者必式

御史中丞贈資政大夫中書右丞上護軍追封
平陽郡公謚文靖徐公神道碑

公諱毅字伯弘姓徐氏世為平陽趙城人家于霍峰鄉
石明里高祖諱澤曾祖諱閏皆力本尚義值金季之亂

晦迹弗耀入皇朝始有出而仕者祖諱玉由元帥府都
提控歷崞縣提領岢嵐州長官終於河東南路提舉常
平倉事御史中丞王公博文銘其墓累贈嘉議大夫上
輕車都尉追封平陽郡侯祖妣高氏平陽郡夫人考諱
德舉由尚書省掾出為平陽路轉運司經歷終於太原
路鹽使司提舉翰林學士承旨姚公燧銘其墓累贈中
奉大夫護軍追封平陽郡公妣盧氏邢氏並平陽郡夫
人公盧夫人出也幼穎異壯歲受業於魏國許文正公

磨礮浸灌日長月益以清方勁正為衆所嚴憚莫不以

遠大期之弱冠辟

闕

掾調同知檀州事當國者急於

賦歛督責甚峻郡縣長吏奉承如恐弗及公獨不阿其
意惟務布德澤以甦疲瘵人稱其有古循吏風焉世祖
皇帝聞其名擢監察御史上言江南新附未久宜隱恤
流亡以固民心京師天下根本宜蠲除地稅以厚貧民
檢覈災傷宜以時而發倉廩之儲捐山澤之利申明酒
禁以修荒政鰥寡孤獨宜有養民所疾苦宜遣使詢問

方今庶政姑息中書親細務而宰相失體六部僚屬多
非其人因陳省臺為治之要及憲司事宜監治官吏當
加儆戒不可因人之誣言而升降察官行樞密院行大
司農司行通政院及尚書省理筭受賞進官者皆可罷
又以日食地震乞罷諸行省四川妄啟邊釁交趾虛勞
王師獻策以邀功生事者宜勿聽官軍承襲皆膏粱子
弟未嘗知兵當別議立法增國子之負重教官之選以
興學校治宗朝以崇祀典脩國史以存故實設朝立班

不可全無流品之分實封陳言毋使苟為進身之計它如選用官吏減錢糧之費理婚田之訟馬禁水利鹽鈔諸法其弊當救者前後所奏七十餘疏其言後多施行世祖賓天上封事于太皇太后皇太后曰四海不可一日無君大行皇帝奄棄天下已五日矣苟非早定大策萬一或啓姦覲變生不測實可寒心皇孫撫軍朔漠先帝既授以皇太子寶聖意可知伏願明諭宗藩大臣叶謀推戴遣使奉迎歸正大統上以副先帝之遺意下以

慰四海萬民之所屬望廷議違之成宗皇帝既踐天位
首請早正東朝尊號以嚴孝養因言陛下方虛心求治
而大臣不肯任事人主之職在論一相今宰相負太多
論議不一巴延乃先帝舊臣留以遺陛下宜亟相之為
治不在過求高遠但當遵守舊制其要有四親賢遠佞
信賞必罰而已又伏闕上言建立儲貳敦睦宗藩選任
臺諫教習親軍勿事西南夷而專備北邊赦不可數等
十事所上疏又二十餘上皆嘉納焉擢僉陝西漢中道

肅政廉訪司事未上改吏部員外郎時選曹事多壅滯
公不懼權勢凡銓量注擬必考其資歷察其才品人皆
悅服奉詔使甘肅給軍需糴買轉輸規措有法事集而
民不擾除僉河東山西道肅政廉訪司事閱所部獄囚
而得其寃狀所釋五百餘人時稱明允召為徽政院長
史舊例臺察於徽政之事一無所問公謂法者天下之
公器宜共遵而行之臺察者執法之司何獨不得與聞
徽政之事乎有與公不相能者力詆之公即謝去尋除

樞密院經歷贊決事機申嚴號令本兵者賴其欣助為
多遷御史臺都事改右司郎中除陝西行臺治書侍御
史並以外艱不赴服除召為左司郎中夙夜匪懈彌綸
庶政損益進退必中其度列曹咸取則焉擢治書侍御
史柄臣欲構害御史郭章公力為之辨有沮之者事竟
報聞公以言不行自引去召還授陝西漢中道肅政廉
訪使關右地接羌戎人多强悍號稱難治公柔之以恩
而懾之以威土俗為之丕變入為刑部尚書上言自昔

有國家者必定律令使有司知所遵守方今承平日久
宜叅酌古今立一代之成法上可其奏仍命總其事方
次第就緒未及上而改授河北河南道肅政廉訪使無
何復入為刑部尚書擢侍御史除僉樞密院事仁宗皇
帝在儲闈素知其有公輔之器及正位宸極擢江南行
臺侍御史遷燕南河北道肅政廉訪使召赴闕遂叅議
中書省事頃之拜陝西諸道行御史臺御史中丞力辭
而歸每謂人生未老得閒乃為貴吾年周六甲歷事四

朝恒以無能補報為懼安敢昧止足之戒乎延祐元年十二月二十六日以疾薨于里第之正寢享年六十有一卜以某年某月某日葬某鄉某之原公累階資善大夫計聞上嗟悼不已詔特贈資政大夫中書右丞上護軍追封平陽郡公謚文靖仍命詞臣為贊書以褒寵之娶裴氏封平陽郡夫人子男一人宗義亞中大

夫衡州路總管女四人長適常德路總管裴宗文次適姜某夫亡年未三十即歸居父母家今已七十餘

次適朝列大夫曹州尹麻鄘次適敦武校尉

闕

權茶提舉王奇孫男二人倣僖公遺書有奏議五卷詩
文三卷翰林學士吳公澄為之序惟公以純實之資克
成正學遭逢聖代為時名臣雖雅志恬退造次不忘於
愛君憂國光膺茂渥生榮死哀不亦宜乎公歿之歲某
始舉進士至京師後三十有五年公孫倣以墓隧之碑
未建介翰林修撰王宗哲以銘來屬某雖不及游公之
門而覲其光儀聆其謦欬讀公之書而尚論其世君臣

之際何其盛哉序而銘諸史臣之職也曷敢以不敏辭
銘曰

惟公之先隱顯以時再世外官不大厥施委其餘祉伊
公之貽公初筮仕華問四馳擢寘臺端用副倚毗作帝
耳目為國著龜宮車晚出人心危疑盡言無避神器有
歸出將使指風紀是持入綴從班獻納論思乃濟宥府
乃陪宰司訐謨遠猷贊襄萬幾峻陟文階執法太微胡
然遠引莫可馬韉公身在外忠愛不衰庶公復來赤烏

衮衣遺表上聞當宁齋咨一鳳之鳴六龍以飛申錫寵
褒厥有制詞有封若堂昭以銘詩

墓碑

格菴先生趙公墓碑

格菴先生趙公宋執政也公之志業未及展盡於一時
而淑艾之私有足惠幸乎百世讀其書者知為吾先生
而已蓋自考亭朱子合四書而為之說其微辭與旨散
出於門人所紀錄者莫克互見公始采集以為纂疏今

四方學者既家有其書以故弗論若公之世系出處固不可俾後之君子無述也按趙氏之先薊人齊國公迥遷居洛齊公之子是為韓忠獻王族大以衍派分而三居亳者曰光祿卿期又遷處之縉雲由光祿三世至公之曾祖考諱濟贈太子太保博平郡公祖考諱診贈太子太傅東萊郡公考諱雷以再薦于鄉特贈開府儀同三司少傅衛國公妣田氏贈蘄國太夫人公諱順孫字和仲八歲能誦說九經嘉定十五年賜童子出身真文

忠公見而奇之謂少傅曰大君之門者必此子也公不

以自矜益務親師取友而求其所未至朝淬夕礪幾三

十年乃以春秋試于鄉于禮部皆第一淳祐十年賜進

士出身調太平州學教授秩滿差江東常平司幹官未

上改臨安府學教授召試除祕書省正字兼景獻府教

授陞校書郎添差通判婺州以內憂去咸淳改元入為

祕書郎兼崇政殿說書公因進講言今茲建元伊始正

治亂相承之機度宗竦聽諭公曰卿老儒議論似富弼

蘇軾公退有旨擢監察御史仍兼說書厯右正言左司
諫遂為殿中侍御史皆兼侍講進侍御史兼侍讀公久
當言路凡日食震電水火為災必援据經傳及累朝故
實為危亡可畏之說隨事致戒時帑藏朽乏而人主不
知宮掖汰侈而大臣不問公疏奏者八面奏者三謂周
官九式均節財用冢宰實總之今之大臣未聞過而問
也豈不曰錢穀出入當如陳平問之主者乎大臣自處
不在周公下而以陳平為足法乎真宗嘗令三司具中

外錢穀大數陳恕以天子富於春秋若知府庫充實恐
生侈心竟不進恕慮先朝知其有臣慮陛下不知其無
也度宗不以為忤令內外諸司條具申省以聞公又言
內廷之帑不可輕發恩賞之濫有所謂特除特轉特補
特贈者不可輕徇庶僚上殿過為瑟縮專求瑣細以備
對揚當申儆之以格習諛踵陋之風累疏乞召洪天錫
陳宗禮陳宜中還居言職劾龔日升昏鄙不宜為察官
它所薦湯漢李伯玉何基徐宗仁呂圻歐陽守道呂大

主等數十人多朝廷宿望及當世知名士度宗皆嘉納
焉美人楊氏進封淑妃公率同列言美人父楊纘上遺
表未半月進封之命已下獨不念其有葛覃之情蓼莪
之感乎䟽入遣中使問公以正謝之期降制之日何時
而可俄又宣諭欲以百日為制公復奏請以暮年為期
時雖不能悉如公言猶久之迺成禮謝堂以從官導旨
樞庭出入宮禁權傾中外公奏外戚用事漢祚中微長
此不已禍有不可勝言者歷䟽其姦於榻前以去就爭

之度宗諭解至再公執之益堅卒免堂官堂之弟廕以節鉞奉朝請居近市其家僮日伺於闌闌間細民以物求售輒攘取之公奏其狀度宗以東朝故猶豫不報公抗疏不已卒罷廕朝請仍徙其居賈似道以太傅平章軍國重事公力陳其買田變楮之弊乞討論之似道上章自辨且求謝事會其姪蕃世守廣德負勢貪虐公奏黜之似道滋不悅公屢以疾丐去皆不允新宮之建議毀民廬以廣衢路雖用公疏令帥漕兩司相度指定奏

聞而帥漕希旨持兩端之說公再疏言力爭堅挽於事
將形之初者耳目官之責陰消潛格於人不知之中者
有股肱之大臣在今之師臣相臣有諫玉清昭應如王
旦之密疏乎似道復上章自辨且乞骸骨公亦以疾丐
去除吏部侍郎兼國子祭酒兼同修國史實錄院同修
撰仍兼侍讀公猶不自安求去益力遂以顯文閣待制
知平江府兼淮浙發運使四年八月也先是郡庾赤立
率以夏初徵民租公謂古者十月納禾稼今先期半載

民何以堪僉曰此例行之三十年不然將有乏興之憂
公不聽首以俸入及例卷所供助糴本而抑浮費以繼
之糴幾二十萬斛迄免預徵郡既大治創學道書院俾
諸生肄業焉五年復以吏部侍郎召尋陞尚書兼職如
故於是似道方諱言邊事言援襄者尤惡之公之入對
首言今所謂危急存亡之秋毋曰端平失襄他時可以
復襄今日之事與端平異不亟援襄禍至無日許翰有
言治世諱危亡之事而不諱危亡之言亂世諱危亡之

言而不諱危亡之事人臣知危亡而不言則人主處危
亡而不知矣入則無法家拂士出則無敵國外患者國
恒亡今敵國外患有古之所無而法家拂士無古之所
有臣甚為國家凜凜也度宗為愀然變色似道笑曰此
書生腐語爾襄縱不守何至不可立國遽以亡言不亦
甚乎公雖莫能與似道合而似道以公時望所屬每倚
重焉六年由吏部尚書拜端明殿學士同簽書樞密院
事進簽書院事兼權參知政事八年同知樞密院事兼

參知政事如故公自躋政地數建守備之策似道自詭
知兵終不以為意馬丞相廷鸞辭位去公獨知省院印
度宗欲遂拜公右揆兼元樞公聞之嘆曰不早用吾言
國將亡而吾相吾其為張悌矣比降麻公適中末疾乃
弗果拜中使傳旨宣問趣御醫診視旁午於道疾少間
除資政殿大學士提舉臨安府洞霄宮仍書御扇出尚
方物以寵其行公舟次富陽謂所知曰吾一疾勝二十
四考矣十年依舊職知福州福建安撫使為州民代輸

夏秋二稅錢以緡計者四十餘萬而寬催特放蠲減之
數禮士犒軍之費不與焉代還之日其士人爭以詩文
誦遺愛軍民焚香夾道持綵旗擁車不忍去者數千人
公既歸知時事不可為憂懣成疾醫以藥進公麾使去
曰吾可死矣以至元十三年四月二十又三日薨于里
第之正寢壽六十有二某年某月某日葬縣南鄉憩雲
之原公階止太中大夫爵止緡雲郡開國公食邑二千
五百戶食實封五百戶配胡氏贈魏郡夫人子男三人

長曰鞏次曰瑾曰華惟華以承奉卽直秘閣終鞏仕皇
朝歷南劔建昌邵武福信五路總管積官通議大夫贈
兩浙都轉運鹽使上輕車都尉追封天水郡侯謚懋康
瑾承事郎南劔路光澤縣尹女一人婿曰東平呂汲孫
男八人長曰桂承德郎湖州路烏程縣尹次曰楠曰機
曰棣曰權曰椅曰某曰某女八人長適懷遠大將軍河
南屯田萬戶陳夔次適葉可大應大圭陳璋胡衡陳允
德杜龍幼在室曾孫男七人女三人玄孫男五人公幼

孤謹於事母而持身以嚴嗜好殊簡薄踐駁中外餘二十年家無留貲焉初少傳師事考亭門人滕先生璘授以尊所聞集公既脫去場屋遲次里居因以得於家庭者邇求考亭之原委纂䟽所由作也後雖成書猶不廢考訂至易簣乃已公處館職秉史筆者或質所疑輒口占其本末以授之其博敏又如此公奏草可見者二十有九所著惟四書纂䟽行於世近思錄精義若干卷孝宗繫年錄若干卷中興名臣言行錄若干卷文集若干

卷並藏於家公位二府法宜有謚于太常有傳於國史而公之歿也兩宮北上九浹旬矣後五十有五年公之孫機以墓隧之石未有刻文爰以狀授潛俾譔次以備闕軼潛於公纂疏之書童而習之而我曾大父戶部府君又與公有同年好施及後人不敢以不敏辭惟公夙受主知以言事官論是非殿陞上方嚮用而輒自引去晚執事樞國步已棘范希文修京城之策不用於慶厯李伯紀經制兩河之策不用於建炎而公援襄之策不

用於咸淳天之所棄孰能興之是誠有非人力所及者
奉身而退以全其歸公之自處則可無憾矣銘曰

道之不行託于空言顯顯趙公則既有聞言路之闢衆
正所聚山川出雲膏澤在下夫豈弗逢止或尼之瀆則
不告歟藏著龜善非為名禮進義退靖共夙夜罔間外
內有命來覲宵衣以湏蹇蹇匪躬終始弗渝孰尸其功
不自為政時遊廟堂勞以二柄念彼多壘載瞻四方曰
其殆而繫于已桑執之仇仇聽之藐藐獨安其危而以

為樂大厦之騫孰持孰扶當宁曰噫其遂相予天胡嗇之弗俾卒相迺以晉陽為國保障允矣明哲歸潔其身碩果不食曰惟斯文若昔大臣飾終有禮謚在奉常傳在太史公則不逮公多遺書銘以昭之過者式諸

濟南高氏先塋碑

國朝之制官七品以上咸得貤贈其先所以廣孝而勸忠也觀夫世數之異等級之殊而其積累之薄厚可得而徵焉泰定元年冬濟南高公以亞中大夫鎮江路總

管致仕品第三有司援典故以聞被旨追贈二代信乎其德厚流光者矣按高氏世居棣州無棣縣之幸禮村歿因葬其地蓋其先出於齊公子高以名為氏譜牒墜逸系緒莫詳今所居則猶故齊地也公之曾祖考曰滄州鹽山縣主簿諱輪祖考曰滄州孔目官諱憲今贈中順大夫同知某路總管府事騎都尉追封渤海郡伯祖妣李氏渤海郡君考曰宣武將軍管軍總管諱璋今累贈亞中大夫某路總管輕車都尉追封渤海郡侯妣趙

氏王氏並渤海郡夫人由鹽山府君而下三世俱有仕籍而志局于位厥施未光貽慶垂祉鍾于後人公實承之公名仁字壽之少以材推擇為吏會天兵南伐署招討司提控案牘歷萬戶府知事辟湖廣行中書省掾從征安南討兩江羣蠻有勞受知丞相順德忠獻王因携以入覲既而丞相改蒞江浙行中書省奏以為檢校官尋遷左右司都事時同僚多以酒權鹽筴之利自汙簿問其事者以公厲獨清之操更見識拔剡上擢中書工

部主事俄復入江浙行中書省為左右司員外郎除江西行中書省理問官治蒙山銀賦之病民者捕寧都土豪之亡命者興利去害績用尤著廷議公以踐散滋久將疇其民庸授吳江州知州下車未幾訟簡役均田里無事乃大飭三皇孔子廟去之日州人相與立石以紀遺愛部使者以最聞授嘉興路總管府治中時列郡方祠奉帝師凡庀材用召匠傭壹出於民力公獨諭浮屠氏之籍於白雲宗者俾任其役官無一粟之毫民無半

餉之勞而祠事以儲部使者復以最聞先是公數捧省檄行旁近郡以丹陽金壇故有公田虛額請悉蠲之而取他羨田補其入又以松江東鄉永利久廢田不宜稻請去故所賦米而用土產菽粟代其輸事皆施行兩郡之人莫不便之年甫七十即乞謝事不俟報而歸吳門別業居焉至是遂休致之請應追錫之命而公之妻楊氏贈渤海郡夫人劉氏封渤海郡夫人公虔奉制書永懷明發展省墓下祭告如禮退自惟念宜有以昭上恩

紀世德乃俾來徵文為銘潛聞古之為銘者必斟酌先祖之美而自著其名焉所以示後世法也謹叙次高氏之世家名爵與公之志行官業而銘以繫之銘曰

顯顯高氏齊文之昭代祀則縣莫守其祧不有厚德孰復乎始蟬聯三葉躋于膺仕胡卒不耀不震以轟諸厥義方嗣人之承展也嗣人是續是似服勤中外時踰四紀乃濟其美乃揚其名罔有失墜以荷寵靈煌煌天書下賁玄宅發其幽潛昭融烜赫辛禮之原歸焉豐碑琢

而銘諸以代鼎彝百世之下視此遺刻維孝維忠永永無極

吳府君碑

泰定元年嘉興吳君漢傑以所居官品第七用著令得請于朝追贈其顯考府君承事郎温州路同知瑞安州事仍封其母陳氏妻陶氏皆宜人厥明年漢傑用舉者以本官署五品職於是府君累贈奉訓大夫江浙等處行中書省理問所相副官飛騎尉追封嘉興縣男陳宜

人陶宜人並累封嘉興縣君漢傑祇奉命書齋肅以告
已事而退竊自念言所以致是者實先人積累之效福

慶衍溢賁及生存國之寵靈非孱焉不肖所克負荷宜
紀世德以承天休垂示後嗣永永無極爰以四明黃向
之狀來謁文潛惟府君之里居世緒年壽卒葬列於吳
興趙公所為誌超操行事施予惠利播於永康胡公所
為銘庸敢掇取其大者以為植德儲祉之符而顯誌之
府君姓吳氏諱森字君茂其先汝南人後徙居嘉興祖

寔父澤並官事宋為水軍正將君少襲武弁以公海制
置使李公魯伯辟署準備差使仕而未顯功伐弗揚國
朝至元間以征東行中書省右丞相范文虎薦任管
軍千戶遭時承平始遂遠引初府君既失所怙悉推賢
產以歸二兄鞠其弟妹逮有家室推是志也達之鄉鄰
飢有米粟寒有纊繒病有藥餌死有棺槨舟梁道路修
除惟時輟田四百畝闢書塾聚閭巷子弟延師儒以教
之由是人知有學有司狀其顛末移部使者覈實以上

中書用近比署其門曰義士云其寢疾也遺命捐種戶
逋租猶三千石春秋六十有四以皇慶二年五月癸酉
委順而終寔于所居西北之麟瑞里於是歲行既周矣
府君有子四人長曰漢英從仕郎平江等處財賦提舉
已卒漢傑其第三子承事郎溫台等處海運副千戶今
方以才顯融於時貤恩所及未艾也嗚呼君子之為善
非以近名而名隨之表立景附聲振響從有不期而至
者矣然其蓄也厚則其奮也不亟易曰積善之家必有

餘慶吳氏其成於積而出於有餘者乎銘曰

皇諏古制引敷孝治疏封班秩咸錫爾類顯顯府君匪
以子貴啓慶自躬曰有吾義其義斯何在物為利由家
而鄉弗屯其施單夫寡人幼童弱稚室無凍餒俗有孝
弟為而不居嗣人之遺乃播乃獲乃引勿替有命自天
下飾丘隧赫其龍光松柏衣被勗哉嗣人無敢失墜便
蕃申錫如川方至增崇本始覃及來裔尚不一書斟酌
祭器

故民應公碑

公姓應氏諱普字德施錢唐人年六十有九以大德八年七月某甲子卒明年二月乙酉葬縣西履泰鄉棲霞嶺北之花塢其配胡氏年八十有一以天曆元年三月某甲子卒四月丁酉合葬焉今國子司業韓公鏞時以使者行部為立石采漢碑式大書其首曰元故民應公之墓而未有刻辭公之子本以書來京師諗于潛曰發幽潛以起衰懦觀人風者之事也吾子以文字為職業

幸序而銘諸按應氏之先汴人政和進士確南渡時來
錢唐遂家焉逮公六世矣公少失所怙依外氏習為舉
子業非其志也尋棄去而讀孫吳書能通其意述將畧
一篇慨然欲以奇節偉行非常之功自奮聞彭文子余
毅夫之為人心竊慕之薄遊江淮間以策干制置使李
公庭芝李公見其魁梧峻整談論娓娓而奇之俾以進
武校尉居幕下當是時內則權臣擅事外則疆圉日蹙
諸將多解體公知無所効其力乃辭歸亡何而德祐失

國李公亦死矣至元間凡異時有仕籍者往往持故所受告身詣京師乞換授公獨晦匿不肯自言我冠大裾逍遙城市中日以教弟子接賓客為事閭巷細人無以自業者時貸以錢而不責其息人多德之胡氏望族女性端謹不喜為容飾以勤儉佐公理其內公既歿撫其幼孤至于成人有子男一人本也女四適周某某錢某周某某郎某孫男四材偉俊華初楊君載未弱冠公識其為佳士俾本與共學楊君後以布衣登史館尋擢進士第

本猶落魄不偶故集賢大學士王公約嘗薦之而本既
老矣材今方以鄉貢進士起君子之澤或者未艾乎銘
曰

古稱平世士無功名胡有其逢而不有成括囊以俟際
于文明傳子及孫復用一經有揭墓門不爵而榮繫此
刻辭以鴻其聲

墓碣

董秉彛墓碣

嗚呼是惟秉彛之墓始予識秉彛鄞江上秉彛方妙年
論議亹亹庶幾能以古人自任者由是數與之游別去
僅三歲而復求秉彛於鄞則秉彛死矣嗚呼悲夫秉彛
名復禮姓董氏世為奉化州人自曾祖庭堅祖成闕至
其父潤無仕者秉彛少嗜書不以貧輟其學故衣敗絮
無以禦寒擁紙被挾冊坐竟日人莫見其有不堪之色
嘗從鄉先生魯月卿為舉子業試有司不中遂不復踐
塲屋益取經史百氏之言鈎微擿隱而求極其根柢間

出以為歌詩雜文皆清麗古雅可喜故翰林侍講學士
袁公甚器重之其父晚得末疾老母弱弟姊妹之未有
家者居處服食婚嫁之須一資於秉彝而後具秉彝未
嘗少戚戚以動其父母之意其父母亦驩然以忘其憂
人以為難鄞胡氏父子素善秉彝為治舍館俾子弟師
事之秉彝深自刻苦與之相摩勵激切夜參半隔牆燈
火明滅猶隱隱聞讀書聲雖憊不自休因以成疾度不
可起則歸與其父母訣竟以泰定三年九月五日卒於

家年三十有三未娶無子以弟驥為之後父命也賴胡氏為買棺乃克以歛袁公為發粟他朋游及方外交又相與合錢為助始克以其年十一月五日返葬于某鄉西圃先墓之次其友汪君敏德以書來曰秉彝死且葬子知秉彝者宜為銘胡氏既買石以俟矣嗚呼悲夫千里駒不出阜樾人知其國馬而未始見其千里也故子於秉彝不敢遽以所可見者為已足獨哀其年之嗇志之未究而死及之序而銘諸有不得苟讓者矣嗚呼悲

夫銘曰

生不予前死不予後夫孰尸之俾其父母不得以為子而予不得以為友也嗚呼

陳子中墓碣

予中涿州陳氏名中因以為字年三十有六至順四年六月丙寅終於杭州之寓舍卜以某年月日祔葬于湖州烏程縣菁山下先墓之側其友哲理野臺筮仕為丹徒適以事如杭買石屬予以銘嗚呼予固不可無一言

以慰子中於地下抑豈忍言之哉初子中合其同志五
六人從予南屏山中丹徒亦在焉欲相率推予為之師
予謝不可則皆曰諾然猶有以父兄之雅故執子弟禮
者予視子中則畏友也子中每篝燈挾冊而坐恒至四
鼓蚤作殊無憊色其析理據事毫髮不苟間出以為文
皆精深縝密可喜而子中莫敢自謂已足不肯急於求
售向之五六人者或擢奉常第或以賢書上春官子中
獨未嘗一踐場屋去年始走京師就試於鄉闈考官得

其文將寘之前列尋復以其說為疑竟棄弗錄子中退自有司嶮崎四千里負笈南還抵家一月而有母憂又兩月俄以暴病一夕不起嗚呼子中而止於斯耶天者之難必而殃慶不以其類乃若是耶子中之大父德用晦跡弗仕父讓故任連江縣尹以奉直大夫杭州路總管府判官致仕盖其先久占籍于涿由奉直仕江南遂家焉母李氏張氏妻亦張氏外家之女也子男一人女一人皆尚幼異時翰林侍講學士巴西鄧公嘗為子中

扁所居室曰庸齋子中請予為之銘予未及為而遽銘其冢上之石嗚呼悲夫銘曰

原田兮沃沃匪重兮斯穆樹之同兮或以弗熟異天之忍予兮胡彼培而此覆子無憂兮不復神之聽之兮後其式穀

蔣君墓碣

潛弱冠時及石先生之門聞先生當宋景定咸淳間執弟子禮者恒以百數顧生晚不得廁其列然竊心慕之

先生沒十有六年而某為諸暨州判官始識蔣君陶朱
山中叩其師友之淵源則執弟子禮於先生者也君不
以輩行自高言必稱同門若嘗與游與居者焉會有詔
賜高年帛郡檄某奉以從事某方踏君之門而君已死
將葬其子果以狀來謁銘某不得辭按狀君諱明龍字
飛卿姓蔣氏由漢兗州刺史詡二十四世至唐尚書左
丞列又十七世至宋國子監主簿某監簿生處州教授
穎教授生國子助教翦助教之子曰一德君之高祖也

曾祖諱嗣興祖諱允恭父諱亨之皆不仕其自宜興徙越之諸暨迨君九世矣君先娶姜氏前三十七年卒有子一人果也後娶楊氏有女二人長適胡一中起進士為紹興錄事次適趙深孫男三人初助教君無恙時有異僧突入其室示以八字曰傳燈佛祖涅槃會人揖而與之語弗顧而去他日以其言驗之壽略如瞿曇氏其歿則雙林唱滅之後一日也自是君之祖若父得壽同歿之日又同君之死也夢其父曰燈燈續傳不自我後

不自我先寤而謂果曰吾先世之聞於浮屠氏者固非
所敢知以今之年明之日徵之殆與吾夢協吾其逝矣
即索紙筆為書與親友訣翌旦正襟危坐奄然而化泰
定四年二月十六日也享年八十有一葬以某年某月
某日墓在某鄉某原銘曰

有生之不齊兮寔命自天修不可強促兮短不可苟延
天胡厚君之家兮賦予之獨專死之日兮生之年一門
四世兮弗後弗先吾因知命可受兮不可傳天者之難

必兮孰測其然于嗟乎君兮尚歸夫全

墓表

石先生墓表

先生石氏諱一鼇字晉卿世為婺之義烏人至大四年
年八十有二卒明年十有二月壬申葬賈山之原嗚呼
先生宋景定甲子鄉貢進士也人莫或用為其稱而稱
之必曰先生者先生學者之共尊衆人之同慕也初徐
文清公倡道丹谿上及門者或仕或不仕皆時聞人文

清之學蓋親得於考亭而祕書丞王君世傑則有得於文清者也先生少受業于監榷貨務都茶場王君若訥既又從祕丞君游學日以茂實大而聲遠負笈而至執弟子禮者亡慮數百人然自祕丞君以來惟用舉子業相授受故先生之門名賢書升學館者相望其高第或據乙科最後榷貨君之孫龍澤遂為咸淳甲戌進士第一人國朝以材學顯融於時者猶彬彬焉識與不識咸以是為先生之盛至其端緒之微蘊奧之邃世固未必

盡知之也蓋先生晚而覃思於易著互言總論十卷其
為說不皆本於徐氏凡文清之教曰命曰性曰心曰中
曰誠曰仁微辭與義或尚有託乎嗚呼昔者子貢蓋歎
孔子之文章而以性與天道為不可得聞竊意今之稱
先生者雖其文章猶莫得而聞也顧以是瑣瑣者為其
盛耶吾見其為先生之累而已嗚呼有足哀乎夫所謂
同尊而共慕者其果出於此乎彼乎潛生也後幸獲執
弟子禮而不及與夫數百人者羣游並進於先生十卷

之書復未能與有聞焉間乃掇其棄餘以充有司之求
向之累先生者閱四十年而固在也嗚呼不又可哀乎
夫使先生之道卒揜遏而弗揚者誰與潛實懼焉謹次
其師友源流揭表墓道庶來者之求先生無以彼易此
而徐氏之傳不終寥寥也先生之世出行事具於塚上
之銘壙中之誌茲不著至哀無文至敬不飾故亦弗復
為之辭

蛟峯先生阡表

故宋禮部尚書方公厯事三朝為時名臣宋亡晦迹弗仕學者因其自號稱之曰蛟峯先生如隱者焉在世祖時旁招遺老以待咨訪詔御史中丞崔或起公於家辭疾不赴以高壽終今天子稽古圖治誕命儒臣刊定前史以監觀其得失而有司莫能奉公事狀以聞竟不為立傳書已上而某與公曾孫道壑適同在史館因得公言行之詳乃摭其大要而序次之以授道壑俾刻石為阡表庸備史之闕文謹按方氏睦之淳安人公曾祖汝

翼贈宣教郎祖謙贈朝散郎父鎔封奉直大夫母邵氏
贈令人公初名夢魁淳祐十年理宗臨軒策士覽公所
對敷陳鯁直親擢為進士第一賜名達辰故公以君賜
為字用例補京官簽平江軍節度判官廳公事實祐元
年召為秘書省正字升校書郎引疾去官除著作佐郎
未命知寧國府未上並以言者罷開慶元年召為著作
郎魚權尚左郎官居無何復以言者罷除知婺州以外
臺奏寢新命除知嘉興府未上改知瑞州甫及暮亦皆

以言者罷咸淳元年召為司封郎官兼國史院編修官
實錄院檢討官兼直舍人院累遷秘書少監起居舍人
三年出為江南東路提點刑獄公事徙江南西路計度
轉運副使五年入權兵部侍郎同修國史實錄院同修
撰兼侍讀七年知貢舉竣事除吏部侍郎丁內憂服闋
以左侍郎召辭不赴自是不復出德祐元年除京湖
四川宣撫司叅謀官權戶部尚書改禮部尚書俱以父
疾辭遂丁外憂此公所閱之官也秘閣修撰公之職也

承事郎屢轉至中奉大夫公之階也某縣開國男食邑三百戶公之爵也鄭丞相清之秉政御筆以雷變徹樂減膳恤刑獄而獨無求言一條中外傳聞以為廟堂監謗之術及兩察官以忤清之去官公亟扣閤上書力言之且謂所貴乎大臣者以道事君不可則止今君嗣未定不能贊之敵國佯遁無以備之貨臣聚歛土木方新顛而不扶危而不持則具臣而已聞其屢䟽丐閒留之者愈堅攻之者愈衆此非所以愛之時公猶在期集所

而未官也上特優容之賈丞相似道制置兩淮海州喪師更以捷聞公上疏言海州之事三尺童子皆能言之而閭臣以敗為勝陛下曲徇其意出御筆令學士院降詔獎諭之豈不知而受其欺耶抑已知而姑以揜外觀而自欺耶願陛下急收回御筆以解萬世之議而免外國之笑借曰萬世之議未暇恤隣敵笑我何以立國乎公之取怒於似道自此始理宗在位日久務撓攬權綱政多從中出羣憚乘時弄威福之柄公上疏曰當大本

猶豫之秋豈無旁睨蜉蝣之撼甫節之蝕蝕難度其心
平勃之屹屹當儲其後又曰天下有貧州縣而無貧太
守有貧國家而無貧邸第南司貧而北司之應奉不貧
百姓貧而緇黃之窟宅不貧至於挾小才以濟大貪者
近親有依憑焉宮中有承受焉左右有游譽焉陛下以
得之左右者出自聖斷而用之曰吾自除吏也不知有
從旁竊威福者矣又曰京有尹畿有漕所以培護根本
愛養命脉邇年居是官者不過為奄豎輩一大承受耳

無名宣頭真偽莫詰非時取索隱匿莫稽仇士良謂天子不可令閒暇若以財貨聲色蠹其心使無暇更及它事然後吾輩可以得志今此曹遑遑汲汲求適吾意者正士良之策也帥漕兩司疲於應奉帑庾赤立萬一畿甸之內有一旦警急何所趣辦何所倚仗乎願斷自今日止營繕省宣索兩司不急之應辦悉停之左右並緣需索之有例者悉閣之然後可以救兩司之貧為緩急之備也上頗感悟而土木之功不為少輟公復因論邊

事屢及之有曰善處急者不以急亦不以暇古之謀人國於江左者莫窘於淮淝而談笑奕棋莫迫於新亭而從容就席固不以急也外示談笑而內有以神其指授之畧陽示從容而陰有以伐其壁後之謀所謂暇者豈真暇哉又曰吾有以自謀而不以鄰國之存亡為安危則不依於人吾有以自備而不以敵國之緩急為喜懼則不制於人苟以彼之存者為安緩者為喜萬一隣敵陽示安枕以紿我而假敵以道躋可噬乎又曰今與敵

對境我無一日謀敵而敵無一日不謀我彼所築者金城鉄壁我所築者土妖血山彼所築者奪我地為之我所築者奪民地為之其言切中當時玩細娛而不圖大患之病尋上䟽極陳備邊之策曰以必爭之規模奪浮光然後可以全兩淮而保長江以必死之規模守樊襄然後可以拒光化而全江陵夫淮之猶可守可耕者以有一綫之河也今涉河而築浮光乃吾戶內若屯於斯耕於斯教訓於斯日夜出騎以撓我淮東西俱不可耕

矣雖堅城閉壁而坐於禁制不得動矣為吾之計當勉諭淮閩盡力以爭浮光則兩淮猶可安枕也萬一樊襄不守彼反奪之則江陵孤注尚足恃哉為吾之計當擇荆之猛將責以必死之規模守樊襄則北可拒光化南可全江陵一則思所以奪其地二則思所以爭其民則對壘之勝負決當在此而不在彼矣識者謂公此疏真活國之良劑朝廷不能用以至於亡而公言無不驗重為之太息焉御史洪天錫劾內官盧允升董宋臣不行

而去公移書宰相勉以行申屠嘉之事且抗疏援膏肓
二豎為喻曰何陛下愛其國不如愛二豎之甚乎漢唐
之季建置天子在奄豎掌握罪大惡極朝廷不能誅之
天下必有起而誅之者漢之宦官陳蕃竇武爭之不勝
并州之將操戈而殪之唐之宦官宋申錫攻之不勝河
中之帥移兵而屠之小人之在君側操心何所不至其
所以不敢動於內者盖有所憚於外若外不足憚則無
忌憚之心生而無君之惡動矣言尤激烈上覽之不悅

公遂稱疾求去。丁大全方以臺長用事，欲鉤致諸賢。公見幾而作，謁告徑行。董丞相槐勸公不必遠，引公曰：「丞相且自照管，越數月果為大全所擊而去。」吳公潛拜左丞相，公亦召還。會國子博士徐庚、金等言：「大全雖去，相位而六賊尚存，乞誅之以謝天下。」上諭潛不當汲引庚、金等，議論紛紜，潛於榻前自辨，上為之歛容而隙自此開。先是，鄂渚危急，上命似道提師江陵，似道奏請下流兵權，潛奏鄂以上既屬，似道鄂以下宜屬。趙葵上不從。

徑以下流併聽似道節制凡似道密奏外廷不得預聞
上反以不知邊報為潛罪及廷臣奏忠王之立人心所
屬潛獨不然姦謀叵測潛遂罷相中外惴惴疑必有後
命公上疏曰天下之所同好我獨惡之天下之所同非
我獨是之則為人上者亦難知矣大抵上易則下親上
難則下畏下親則上安下畏則上孤窘急而求之一緩
而遣之號呼而進之一唯而退之旁觀沮縮何以作人
任事之氣乎上問為誰公奏臣不敢直指願陛下曲回

天怒以安中外上乃首肯而榻前款密之言外廷無聞
知者既而似道入相希指論公者章連上矣度宗即位
公乃還朝一見甚喜欲大用之公乞命朝臣為知縣以
重其事權專以均田稅正版籍均力役勸農桑崇孝悌
訓士卒除盜賊為考課之法有旨從所奏後沮不行此
公之忠謹見於立朝者也信州措置軍糧失宜召亂朝
廷以江東臬事付公聞命就道及境或來言城中事勸
公偃旗息鼓而過公笑不答即日單騎入州決獄一城

肅然密戒能事者訪得亂卒姓名禽其兇渠逆黨悉寘
于法事平有詔褒諭比公於韓魏公云公於它獄事莫
不盡其情故一路無冤民而盜賊屏息及將漕江西有
獻議於廟堂請以銅錢一當十委公自江西行之公抗
言其不便而止講行賑糴以救民饑乞蠲和糴以甦民
病有女妖以左道惑衆隣郡愚民十百成羣踵門徼福
公杖而流之由是遂息此公之績用見於出使者也盖
似道柄國十有六年公屏居者十年諫則不行言則不

聽而施于有政者又厯厯若是此有志之士所以羨其
際逢之盛而惜其設施之未究也公天稟卓絕於書無
所不讀而會於理學以為歸宿自為幕職官至秉麾持
節所至以教化為先務暇日輒從容庠序間授學者以
求端用力之方自躬行上起自人倫日用上起婺之東
陽有好事者創義學迎致公為之師從游者數百人閩
人林光世夤緣宦豎而賜出身及為浙東常平使者首
劾公不當俯就義學之招婺州之命由是而寢公遂即

家建塾以私淑其徒後以從官侍經帷每事啟沃以格
君心度宗眷遇之甚至問公講授之所賜御書扁額曰
石峽書院仍賜手詔褒寵之江南新附鄉寇猖獗官舍
民居盡燬而書院巋然劫火之餘葺治既完諸生稍稍
來集倡明正道以致知力行名其堂以仁義禮智名其
齋時所在士風黷靡公所以振起而作新之者成效甚
著此則公自任以師道之重期於繼往聖而開來學者
也公所著有孝經章句一卷易外傳圖說五卷尚書釋

傳四卷中庸大學釋傳三卷格物入門一卷行於世公
人物魁岸聲音如鐘磊落若青天白日渾淪醇厚不見
涯涘觀書至老不廢視紛華盛麗事蔑如也待諸父昆
弟子姪各盡其禮接物以誠而無不悅服不為察察而
自莫能欺公卒於至元二十八年正月三日享年七十
有一以三十年三月二十九日葬于縣西之安谿娶趙
氏封令人再娶朱氏子男三人長梁太學生次棟次杰
入皇朝並以儒起家棟月泉書院山長杰長洲縣學教

諭然皆恬於進取不有顯秩女三人長適脩職郎無為
軍無為縣主簿徐敏中次適武學生項雄飛次適邵元
廷孫男四人女三人曾孫男七人女一人棟之孫道壑
以至順元年擢進士第今自翰林國史院編修官出為
嘉興路總管府推官階某郎石峽書院既領於有司而
設師弟子員道壑病其庠迫弗稱乃以公之故居廣其
基址而新其棟宇絃誦之聲不減公在時先儒有言道
不行百世無善治道不傳千載無真儒公之道雖不行

於當時而其學有以傳於後世夫何憾乎潛之曾大父
左曹府君實公榜中進士託斯文之雅故於公門四世
百年矣今所述乃學士大夫之公言非潛之私言也來
者尚有考焉

盤峯先生墓表

睦之桐廬有隱君子曰盤峯先生以至大三年正月八
日卒年六十有七越七年乃克葬于縣北大隱阡先墓
之次延祐三年十一月某日也去年秋某以退休之餘

被命復出艤舟桐廬驛先生之孫裕來謁曰吾祖之葬
予之鄉先生方公鳳既為誌于玄堂而未有以表諸封
隧今三十有三年矣懼愈久人無得而稱焉敢惟子也
請昔在宋季先生之外舅將作少監朱公杰與潛之曾
大父戶部府君仕同朝居同里先生於潛為大父行潛
年十六七即叅陪於杖屨之末先生古貌野服高談雄
辨四座盡傾每語當世事及前代故實亹亹不倦然喜
汲引後進有如潛之無所肖似猶不以凡子見遇每折

行輩以相傾下興懷疇昔夢寐不忘竊願以一言自託
於先生不可得而潛亦老矣矧以裕重有請乎先生少
力學工於文辭嘗携所業贄見內翰劉公克莊大奇之
由是名動州邑弱冠游太學登咸淳四年甲科賜進士
及第調衢州軍事判官用龍飛恩階文林郎居官有廩
能聲大叅家公鉉翁詳刑浙左雅知先生所至輒挽以
自隨獄事悉委焉屬部之民有縱火殺人者株連坐繫
甚衆歲久不決先生探得其情多所平反它疑獄經先

生詳讞無不服其明允衢俗好鬪不相能則弄兵以相
讎先生被郡檄徧行村落戒諭之皆委刀劍為良民蜀
名卿史公繩祖僑寓是邦先生暇日輒相與研究先儒
性理之學為士者往往聞其緒言而有所開悟故相留
公夢炎郡人也愛先生才且賢欲以女歸之先生不可
乃已秩滿辟御前軍器所幹辦公事未幾國破而家亦
燬先生避地萬山中草棲露宿若與世隔久之乃歸而
稍復其故宇為終焉之計程公鉅夫以侍御史將使指

南來求遺逸之士得先生以應詔先生固辭弗能強也
留公入覲後為吏部尚書所薦前進士七人獨王公龍
澤起為行臺監察御史而先生甘老於布衣桐君古隱
者廬於東峯指桐為姓縣以得名先生居東峰之下西
望漢嚴子陵釣臺唐方玄英白雲原僅數十里山峙川
流儀刑如在先生徘徊其間慨然以古人之風節自期
與鄉先生袁公易魏公新之為三友袁魏云亡先生跼
孤才立如鼎一足意有不適咄咄書空而已家公當運

祚之垂絕以使事如京師久留河間先生數致書候安
否既得歸年已八十先生徒步往見之握手道舊故輒
相對欷歔泣下前郡守方公回既奉版圖上于職方復
以總管魚府尹終更猶留居久乃去前後十有二年先
生不一造其門後與之邂逅于錢唐始恨識先生晚賦
詩媿謝焉先生屬續前二日猶與親友劇談盡數刻精
神無少憤眊亦足見其所養有素矣孔子曰殷有三仁
焉說者以為人臣之義莫易明於死節莫難明於去國

而屈辱用晦者亦所難辯宋之亡也先生不在其位而
未始行乎患難不降其志而卒以明哲保身從容於出
處去就之際而不至於屈辱其善用晦者歟蓋人之難
能亦非人之所難辯是用因其迹以推其心之所存論
次而表顯之庶百世之下有觀感而興起者焉其言行
之詳誌所載已具茲不復贅先生姓孫氏諱潼發字帝
錫一字君文盤峰其別號也先世由婺之金華徙桐廬
遂為睦人高祖顯曾祖寶祖漕貢進士庶父承奉郎致

仕之才母孺人方氏妻朱氏子男二人濬誼女二人適
施昉毛元孫男若干人女若干人曾孫男若干人女若
干人先生所著述散見於學者之家子死孫幼久未克
褒聚彙次以行惟手編前賢紀詠桐君事曰桐君山集
者人多傳之

翰林待制柳公墓表

公諱貫字道傳姓柳氏其先由展季仕魯食采柳下因
以為姓子孫居河東者在唐為官族宋南渡初有自解

徙杭者生子曰森又自杭徙婺之浦江家於縣西烏蜀山歷四世至公之曾祖考諱蘊俱韜晦弗仕而寓迹於醫祖考諱補之迪功郎嘉興府崇德縣主簿考諱金忠翊郎高郵軍高郵縣令入皇朝以公貴贈奉訓大夫淮安路泗州知州飛騎尉追封浦江縣男妣俞氏追封浦江縣君公之生也外大父閤門俞公葵暨泗州府君同擢右科進士第因命之曰贊義取兩文易兩武贊於今文為貫故公自署其名為貫云公幼有異質穎悟過人

嘗侍泗州府君謁神祠得旁人所遺金珠可直萬緡密
伺其人復至而還之泗州府君大驚知其器量不凡期
以遠到卅歲遣受經於同郡金先生履祥即能究其旨
趣而於微辭奧義多所發揮既又執弟子禮於同里方
先生鳳括吳先生思齊粵謝先生翱三先生隱者以風
節行義相高間出為古文歌詩皆憂深思遠慷慨激烈
卓然絕出於流俗清標雅韻人所瞻慕公左右周旋日
漸月漬不自知其與之俱化也杭於宋為故都向之宿

儒遺老猶有存者公徧游其門無不折行輩與為忘年交而與紫陽方先生回淮陰龔先生開南陽仇先生遠句章戴先生表元隆山牟先生應龍永康胡先生之純長孺兄弟交尤密往來咨叩無虛日凡學問之本末文獻源流歷歷如指諸掌發於論議言必有徵不徒事浮藻以追世好也諸公亦往往喜為之延譽由是名聞於一時初東平王公侯持使者節按察屬部大舉學政教官之備員充位者一切謝遣之更延致前代賢士大夫

之老於文學者補其處於是泗州府君為之起而主教
於鄉邑公在侍側王公一見輒加器重亟稱薦之公年
甫弱冠殊未有仕進意後十有餘年始以察舉為江山
縣學教諭又為昌國州學正江山乃川阻山窮處昌國
則邈焉雲海島嶼間公不鄙夷其所至日與為士者
敷陳仁義道德之說人多化之用累考赴選集於京師
中書左丞張公思明首令子弟來就學達官大人得公
又皆竒其才公例當教授一州用薦者特授湖廣等處

儒學副提舉未上改擢國子助教階將仕佐郎由助教為博士轉將仕郎前後在弟子列者千餘人業成而仕後多知名遷徵事郎太常博士時方承平稽古禮文之事次第並舉遇有所討論公援據詳洽權古今之宜而為之折衷廷議莫不服其精當沅州歲貢包茅四十匭茅輕舟搖多致覆溺公請附以它貢物鎮其舟至今以為便勲戚大臣請謚者數十家文移山積久格不行公悉為考行易名以上凡三月而畢臨江守李侯倜為部

使者所劾它使者力辯其誣後終於大官當得謚其家
求於謚議中母及臨江事公曰著其事而白其非辜安
可没乎其子乃歎服柄國者欲以其祖配食孔子廟衆
莫敢忤公獨毅然持不可而止有神降于洛郡長吏列
上儀曹乞加封爵公以為神姦能鼓民不治將為亂宜
下所部禁戢之儀曹符本郡如公言監察御史馬公祖
常薦公才任風憲章再上皆不報丐外以文林郎為江
西等處儒學提舉視事伊始吏循舊比以列卷進歲為

米八十石公斤去之後來莫有敢追襲其弊者龍興郡學久廢公為新其棟宇聘名儒為學者師士風以之復振道士作廟屋侵學地東湖書院田為僧所據者三百二十畝悉奪而歸之它書院不籍於官者無慮數十舊設主領一員司其金穀之出納公命勿設而以其事分隸所在學官豐城尸教席者不任職士子因持其短長交訐互訟公折以片言而各當其罪莫不心服修漢先賢徐孺子墓立宋高士蘇雲卿祠古碑碣所紀有關於

名教者必訪求而重刻之苟可以扶世導民者無不為也南康倉吏坐株連逮繫百餘人公被行省及憲府檄讞其獄鉤擿隱伏而得其情所平反甚衆人尤服其長於政事秩滿而歸杜門不出者十有餘年自號烏蜀山人扁其齋曰靜儉室廬僅庇風雨饘粥時或不給處之裕如若將終身焉今天子更化之初登用儒雅而中朝諸老多已凋落近臣以公名聞于上乃以翰林待制承務郎兼國史院編修官起公於家公幡然出見使者退

謂人曰吾老矣忝列職禁林儻緣次對而獲陳堯舜之道以裨聖政之萬一豈非幸歟會有詔復行貢舉法留主文衡於鄉闈竣事乃行到官僅八閱月俄以疾卒于寓舍至正二年十一月九日也享年七十有三省臺院監皆來致賻集賢吳大學士直方國子吳博士師道並敦鄉曲之義共經紀其喪事靈輜南還諸公引紼陳奠於都門之外道路之人咸為咨嗟隕涕夫人盛氏累封浦江縣君前公十二年卒以三年十二月二十三日合

葬于縣之通化鄉荆山之原子男三人長卣次同次曰
孫男三人秬穎穆秬早夭穎以父命用公廕入官未調
女一人公氣韻沈默局量堅凝平居未嘗見其疾言遽
色雖有桀驁者亦皆望之而意銷孝友本乎天性弟實
出後外家俞氏遇之恩意彌篤讀書博覽強記自經史
百氏至於國家之典章故實兵刑律歷數術方技異教
外書靡所不通故其文涵肆演迤春容紆餘才完而氣
充事詳而詞覈蔚然成一家言老不廢詩視少作尤古

硬竒逸而意味淵永後學之士爭傳誦之工篆籀楷法
善鑒定古彝器書畫而別其真贋晚益沈潛於理學以
為歸宿之地焉所著書有近思錄廣輯三卷字系二卷
金石竹帛遺文若干卷烏蜀山房類藁二十卷公之葬
也御史中丞張公起巖以居冑監時夙有同寮之雅故
既為之銘納壙中卣等復奉門人宋濂之狀屬潛為之
表揭于冢上潛與公居同郡學同志辱游於公最久知
公為最深所以圖公於不朽者潛之責也是用弗讓書

而授之俾刻焉其辭曰

柳居河東為唐望宗從宋南遷再世外官公生其季逮
今盛際以文易武承考之意延祐初元朝多俊賢公游
其間翱翔後先于于而來列于庶位詩書禮樂孰非吾
事由中而外退也委蛇遺世獨立一紀于茲國之老成
日益淪謝鋒車在門公不俟駕有懷欲陳堯舜吾君輪
當次對乃以訃聞乘化而行公乎奚憾士林盡傷失其
一鑑斯文未喪儀刑具存表以石章刻在墓門

張子長墓表

上即位之十一年分命儒臣纂修遼金宋三史今師相以監修國史領都總裁既進擬收擢遺逸之士四人以兩院次對之職俾參筆削仍奏辟子長為本府長史使者奉驛券行四千里求得子長於金華山中力辭不拜四方之士莫不高其風後五年申命史臣纂修本朝后妃功臣傳於是山林特起之招皆正除入館俾預討論子長名在五人之列以翰林修撰儒林郎同知制誥兼

國史院編修官召復避不就使指有嚴不得已為之起
行至武林驛卒辭而歸士益以是高之子長之才之美
過絕人遠甚其無媿於前修可傳於來世者則不在彼
而在此也子長姓張氏樞其名子長其字幼聰慧爽朗
受教於父屏巖先生而外家潘氏蓄書數萬卷金石遺
文千餘卷子長盡取而讀之過目輒不忘且能通其大
意年十四五肆筆成章頃刻數千言嘗作小臣策譏宋
高宗忘親事讎而追為之定復兩宮之計以為當時狙

於宴安莫有知出此者時前代遺老多尚存無不降歎
弱齡益自愛重杜門不妄出頗易視當世直欲方駕於
古人同郡之士與之交者可以僂數暇日寓情卮酒意
氣豁然視餘子蔑如也海內賢士及名卿才大夫至於
是邦皆以得見為幸或問以古今沿革政治得失咸樂
告之宇宙之分合禮樂之廢興以至帝號官名歲月後
先皆無所脫誤每及一人則其世系閥閱與才質之良
窳厯厯如指諸掌論事後當成敗不旋踵皆驗初東萊

呂成公倡道於婺不幸天不假以年故婺之言性理悉本於紫陽朱文公由文公五傳為白雲許先生子長少先生二十二歲先生偶見之漫叩以漢高帝何以取天下輒應口而對出入紀傳貫穿鉤引語蟬聯不能休先生大竒之閱數日子長以書上謁先生答書勗之以正道期之以大成子長請就弟子列先生不可始終以朋友待之自是子長益歛華蓄銳超於平實學日以粹其能不失乎進退之正者學力所至也凡為文務推明經

史以扶翼教道不喜作瑣瑣侈靡諂諛戲豫放浪無實之言謂學春秋者必始於三傳而其義例互有不同乃辯析其是非會通其歸趣參以儒先之說裁以至當之論為三傳歸一義三十卷又謂啖氏於春秋卓然有見於千載之下而陸氏繼之所纂春秋微旨以朱墨別三傳之當否歲久漫滅寢失其真乃重加考訂為三傳朱墨本若干卷言有未周意有未暢則出新義以補之金之鉅儒大寧敬先生有春秋備忘久未及行於世暨入

國朝先生之諸孫

闕

公儼以憲節來泣於發橐其橐

請子長為之校讎乃因近臣以聞而刻焉謂三國之正
閏固不待辯自古國必有號史亦從其實而書之漢之
為漢未嘗稱蜀陳壽欲帝魏而以晉承其統遂以蜀易
漢抑此所以伸彼也壽父獲罪於諸葛武侯而壽又為
武侯子瞻所薄故於武侯之駿功偉烈多略弗著而武
侯再挫司馬懿亦沒而不及內以報私憾外以為時諱
也譙周壽之所師力贊後主納款於魏賣降覆國壽不

以為非反善其策餘所書往往類是乃糾其紕謬之害
義正其繁簡之失宜為刊定三國志六十五卷又別撰
漢本紀列傳附以魏吳載紀為續後漢書七十三卷三
國之臣有能致節於其君者舊史或諱不書或書而失
其實或僅見於異代之史皆為更定而於漢事必備載
以詳正統或一事數說必參訂使歸于一是非疑似抑
揚予奪咸有論著繫于各篇之後名曰訓志經筵檢討
危君素言子長是書立義精密可資勸講朝廷為下本

郡取而上之宣文閣藏焉它所著有林下竊議一卷曲江張公年譜一卷謂宋之亡也將相群臣伏節死義者固已有傳在史氏卑官下士吏卒女婦之死者多史所弗錄乃詢諸故老旁采稗官得若干人為宋季逸事若干卷平昔所作歌詩歲銘贊頌碑記序說誌狀之屬有敝帚編若干卷其言閎深浩博而峻厲潔清援據精切而論議純正尤長於叙事而扶善遏惡率能使人有所感發懲創至於微辭奧義又有未易以淺窺者大抵其

文主於氣氣命於志志立於學故言無所苟出處之際
無不克踐其言江西鄉閭嘗奉書幣迎致子長司其文
衡返其幣而卻其請蓋塲屋之文非子長之所謂文也
子長之先占籍臨海唐乾寧間避地來徙遂為婺之東
陽人宋末稍有出而仕者曾祖日新承節郎祖友諒廸
功郎父觀光屏巖先生也娶金華潘氏又自東陽徙家
金華先生少游太學德祐納土從三宮北上用執政薦
授婺州路儒學教授階將仕郎仍刻印以給之婺歸皇

朝之後有學自先生始在官十年改調紹興路平準行
用庫大使循新例換將仕佐郎以母老不赴遂弗仕家
食者垂四十年而卒子長生於至元二十九年二月二
十五日卒於至正八年八月四日享年五十有七娶王
氏既不克終事子長故子長無子為之後者長曰燧李
氏甥之子也次曰燃族人之子也以十年十有二月九
日奉子長柩葬于金華縣循理鄉信義里許先生之歿
以其子元屬於子長元欲師事之而子長則以先生之

待已者待馬子長之葬元既狀其行實之詳乞銘於危
君且求潛撫其大者表于墓隧先是浙東部使者交薦
子長章九上俱未報逮論撰之命適承乏北扉法當
歲舉守令一人因以子長應詔廷議以子長累徵不
應重於勞以州縣之事遂格不行子長平生大節非獨
為士者知之宰執大臣亦知之矣夫既有以信於今不
可無以貽於後元所以汲汲焉為之圖其不朽也後漢
所稱樊英初被詔命僉以為必不降志及後應對又無


竒謀深策談者以為失望豈不以其名最高故其毀益甚乎蓋名者衆人之所忌君子之所避也嗚呼子長明炳幾先薰不自焚膏不自煎以保其身以歸天全松栢丸九清風凜然自今千年過者式焉

欽定四庫全書

卷十下



文獻集卷十下



總校官庶吉士臣張能照
校對官中書臣范 鏊
謄錄監生臣鄒世俊

財團法人
佛陀教育基金會
釋淨空
敬贈

